

AKASHVANI (AIR)

RNU : KOLKATA

Bengali Text Bulletin

Date: 28.07.2024

Time: 7.50 P.M.

বিশেষ বিশেষ খবর –

১) প্রধানমন্ত্রী তরুণ প্রজন্মের মাদকাশক্তির শিকার হওয়া নিয়ে উদ্বেগ প্রকাশ করেছেন। আজ আকাশবাণীতে মন-কি-বাতে তিনি মাদকের বিরুদ্ধে লড়াইয়ের জন্য তৈরি মানস কেন্দ্র সম্পর্কে সকলকে অবহিত করেছেন।

২) হর ঘর তিরঙ্গা অভিযানে, নাগরিকদের সকলকে অংশগ্রহণের আহ্বান জানিয়েছেন।

৩) কলকাতার আনন্দপুরের প্রমোটার খুনের ঘটনায় একজন গ্রেফতার বাকিদের খোঁজ চলেছে।

৪) প্যারিস অলিম্পিকে ভারতকে প্রথম পদক এনে দিলেন মনু ভাকের। অভিনন্দন জানিয়েছেন রাষ্ট্রপতি, উপ-রাষ্ট্রপতি, প্রধানমন্ত্রী ও মুখ্যমন্ত্রী।

৫) ইস্টবেঙ্গল ক্লাবের বাংলার গৌরব সম্মান পাচ্ছেন ভারতীয় দলের পেস বোলার মহম্মদ শামি।

oooooooooooooooooooooooooooo

প্রধানমন্ত্রী নরেন্দ্র মোদী, তরুণ প্রজন্মের মাদক আসক্তির শিকার হওয়া নিয়ে উদ্বেগ প্রকাশ করেন। আজ আকাশবাণীর বিশেষ মাসিক অনুষ্ঠান মন কি বাত-এর ১১২-তম পর্বে শ্রী মোদী বলেন, ছেলে মেয়েদের ড্রাগের মতো সর্বনাশা নেশার ভয়ংকর বিপদের হাত থেকে বাঁচাতে প্রত্যেক পরিবারেরই চিন্তার অন্ত থাকে না। এই পরিস্থিতিতে সরকার একটি বিশেষ কেন্দ্র খুলেছে যার নাম 'MANAS'। চালু হয়েছে এ'সম্পর্কিত একটি হেল্পলাইন নম্বর'ও। এতে ফোন করলে জরুরী পরামর্শ মিলছে।

(বাইট- MKB MANAS)

প্রধানমন্ত্রী বলেন, গ্রামের মহিলারা স্বনির্ভর হয়ে উঠলে দেশের সামগ্রিক পরিস্থিতি বদলে যায়। 'UNNATI' সেলফ হেল্প গ্রুপ-এর সঙ্গে যুক্ত হয়ে মহিলারা এখন পর্যাপ্ত অর্থ উপার্জন করছেন।

(বাইট - সেলফ হেল্প গ্রুপ)

দেশের বিভিন্ন অঞ্চলের কারিগরেরা, হ্যান্ডলুমকে জনপ্রিয় করতে উদ্যোগী হয়েছেন। ৭ই আগস্ট 'ন্যাশনাল হ্যান্ডলুম ডে' পালনে মানুষ এগিয়ে আসছেন, তাও দেশের কাছে অত্যন্ত আনন্দের বিষয় বলে শ্রী মোদী উল্লেখ করেছেন।

আগামীকাল বিশ্ব ব্যাঘ্র দিবস। ভারতীয় সংস্কৃতির সঙ্গে বাঘের শৌর্য্য এবং বিক্রম ওতপ্রতোভাবে জড়িত। প্রধানমন্ত্রী বলেন, ভারতবর্ষের প্রচুর গ্রাম রয়েছে যেখানে মানুষও বাঘ একসঙ্গে বসবাস করেন। বাঘেদের বসতি স্থাপনের উত্তম পরিবেশ তৈরীর জন্য অনেক জায়গায় শুরু হয়েছে বিভিন্ন ধরনের কর্মকাণ্ড।

(বাইট- MKB টাইগার)

দেশ জুড়ে বাঘের সংখ্যা বৃদ্ধির সঙ্গে সঙ্গে বনাঞ্চলের পরিমাণও বাড়ছে।

আর কিছুদিনের মধ্যেই দেশজুড়ে পালিত হবে স্বাধীনতা দিবস। ধনী দরিদ্র নির্বিশেষে নিজেদের বাড়িতে জাতীয় পতাকা উড়িয়ে ‘ঘর ঘর তিরঙ্গা’ অভিযান পালনে প্রধানমন্ত্রী সকলকে আহ্বান জানান।

০০০০০০০০০০০০০০০০০০০০

বিভিন্ন জেলায় মন-কি-বাত-এর সরাসরি সম্প্রচার শুনতে আজ শ্রোতাদের উৎসাহ চোখে পড়ে।

মালদা জেলার ওল্ড মালদা পৌরসভার ১৭নং ওয়ার্ডে পুরাতন মালদা নগর মন্ডল রাকেশ চৌধুরীর বাড়িতে, আজ প্রধানমন্ত্রীর মন কি বাত-এর সরাসরি সম্প্রচার দেখানোর ব্যবস্থা করা হয়েছিল। অনুষ্ঠান শুনতে বহু মানুষ সেখানে ভীড় জমান।

নদীয়ার শান্তিপুুরের আরপাড়া গ্রামে’ও আজ বহু মানুষ মনকি বাত শোনেন। প্রধানমন্ত্রীর ভাষণ শোনার জন্য সেখানে উপস্থিত ছিলেন রানাঘাটের সাংসদ জগন্নাথ সরকার।

০০০০০০০০০০০০০০০০০০০০

পুরুলিয়া জেলায় ম্যালেরিয়া ও ডেঙ্গুর মতো পতঙ্গবাহিত রোগের বাড়বাড়ন্তে উদ্বিগ্ন জেলা স্বাস্থ্য দফতর। এই মুহূর্তে জেলায় ডেঙ্গু আক্রান্তের সংখ্যা ১৮। পুরুলিয়া সদর হাসপাতালে চিকিৎসাধীন পাঁচজন। আক্রান্তের সংখ্যা সবচেয়ে বেশি বলরামপুর ব্লকে। গ্রামে গ্রামে মেডিকেল টিম রক্ত পরীক্ষার কাজ শুরু করেছে। মশা নিধনে স্প্রে করারও কাজ চলেছে। ডেঙ্গু সংক্রমণের আশঙ্কা করলেই হাসপাতালে ভর্তির পরামর্শ দেওয়া হচ্ছে স্বাস্থ্য বিভাগের পক্ষ থেকে।

এদিকে, জেলার মুখ্য স্বাস্থ্য আধিকারিক ডক্টর অশোক বিশ্বাস গতকাল বলরামপুর ব্লকের বাঁশগড় প্রাথমিক স্বাস্থ্য কেন্দ্রে গিয়ে ম্যালেরিয়া ও ডেঙ্গু পরিস্থিতি খতিয়ে দেখেন।

স্বাস্থ্য দফতরের পক্ষ থেকে গ্রামে গ্রামে অস্থায়ী শিবির করা হচ্ছে। পরিস্থিতি আপাতত নিয়ন্ত্রণে বলে জেলার মুখ্য স্বাস্থ্য আধিকারিক জানিয়েছেন।

এদিকে দক্ষিণ ২৪ পরগনার সুন্দরবন পুলিশ জেলার নামখানা থানার পক্ষ থেকে স্থানীয় বাজার এলাকায় ডেঙ্গু প্রতিরোধে বিশেষ অভিযান চালানো হয়েছে।

০০০০০০০০০০০০০০০০০০০০

দ্রুত নিয়োগের দাবিতে আপনার প্রাইমারীর চাকরি প্রার্থীরা আজ কলকাতায় বিক্ষোভ দেখিয়েছে। শিয়ালদা থেকে মিছিল করে ধর্মতলা পর্যন্ত গিয়ে সেখানে রাস্তায় বসে পড়ে বিক্ষোভ দেখান তাঁরা। এর জেরে কার্যত অবরুদ্ধ হয়ে পড়ে গোটা ধর্মতলা চত্বর। বিক্ষোভকারীদের অভিযোগ ৮ বছর কেটে গেলেও ইন্টারভিউ-এর জন্য ডাক পাননি তারা। দ্রুত সব শূন্য পদ পূরণেরও দাবি জানানো হয়।

০০০০০০০০০০০০০০০০০০০০

কলকাতার আনন্দপুর থানা এলাকার উত্তর পঞ্চগন্নাগ্রামে তপসিয়া রোডে আরিফ খান নামে এক প্রমোটার খুনের ঘটনায় ধৃত জাকির খানকে আগামীকাল আদালতে তোলা হবে। তবে, মূল অভিযুক্ত আব্বাসকে এখনও

গ্রেফতার করতে পারেনি পুলিশ। গত শুক্রবার আরিফ খানকে কুপিয়ে খুন করা হয়।

০০০০০০০০০০০০০০০০০০

রাজ্যের প্রয়াত প্রাক্তন কারা ও সমাজকল্যাণমন্ত্রী বিশ্বনাথ চৌধুরীর শেষকৃত্য আজ বালুরঘাটের খিদিরপুর শ্মশান ঘাটে সম্পন্ন হয়েছে। বালুরঘাটে আর এস পি-র দলীয় কার্যালয়ে তাঁর প্রতি শেষ শ্রদ্ধা জানানো হয়। উপস্থিত ছিলেন, আর এস পি-র সর্ব ভারতীয় সম্পাদক মনোজ ভট্টাচার্য, রাজ্য সম্পাদক তপন হোড় সহ দলীয় নেতারা।

০০০০০০০০০০০০০০০০০০

দক্ষিণ ২৪ পরগনার পাথরপ্রতিমা ব্লকের জিপ্লট গ্রাম পঞ্চায়েতের সত্যদাশপুরে এক মৎস্যজীবীকে ফের কুমিরে টেনে গিয়ে গেছে। জানা গেছে, সত্যদাশপুরের বাসিন্দা, মৎস্যজীবী আব্বাস উদ্দিন শেখ এদিন সকালে জগদল নদীতে জাল ফেলে মাছ ধরছিলেন। আনুমানিক সকাল ১১-টা নাগাদ আব্বাস নদীতে পড়ে যায়। সে সময় একটি কুমীর তাকে টেনে নিয়ে যায়। গোবর্ধনপুর কোস্টাল থানায় খবর দেওয়া হলে নদীতে তল্লাশি অভিযান শুরু হয়েছে।

০০০০০০০০০০০০০০০০

দক্ষিণ ২৪ পরগনার কেঁদো দ্বীপের কাছে সমুদ্রের উত্তাল ঢেউয়ে ট্রলার থেকে পড়ে গিয়ে নিখোঁজ হয়েছেন সুন্দরবনের এক মৎস্যজীবী। কুলতলির সানকি জাহান ঘাট থেকে মা অষ্টমী ট্রলারে ১৫ জন মৎস্যজীবী গত শুক্রবার ভোরে মাছ ধরতে রওনা হন। কেঁদো দ্বীপের কাছে ইলিশ ধরার সময় উত্তাল

ঢেউয়ের মাঝে ট্রলার থেকে ছিটকে জলে পড়ে যান ওই মৎস্যজীবী গোপাল মন্ডল।

০০০০০০০০০০০০০০০০০০

টালিগঞ্জের স্টুডিও গুলিতে তৈরি হওয়া অচলাবস্থা কাটাতে চলচ্চিত্র কর্মী, প্রযোজক ,পরিচালক সকলের প্রতি আবেদন জানিয়েছে ওয়েস্ট বেঙ্গল মোশন পিকচার্স আর্টিস্ট ফোরাম। আজ প্রকাশিত এক প্রেস বিবৃতিতে সংগঠনের সভাপতি রঞ্জিত মল্লিক ও সাধারণ সম্পাদক শান্তি লাল মুখার্জী জানান, অচলাবস্থা কাটাতে তাঁরা মধ্যস্থতাকারীর ভূমিকা নিতেও প্রস্তুত। কিন্তু কাজ বন্ধ হলে বহু মানুষের ক্ষতি হয়ে যাবে। অবিলম্বে সব পক্ষকে আলোচনায় বসার আহ্বান জানিয়েছেন তাঁরা।

০০০০০০০০০০০০০০০০০০

ডায়মন্ড হারবার গামী লোকাল ট্রেনে আজ আগুনের ফুলকি দেখতে পেয়ে যাত্রীদের মধ্যে তীব্র আতঙ্ক ছড়ায়। এর জেরে শিয়ালদা দক্ষিণ শাখায় ট্রেন চলাচল ব্যাহত হয়। জানা গেছে, আজ বেলা ১২-টা ১০ নাগাদ, লোকাল ট্রেনটি সুভাষগ্রাম স্টেশন পৌঁছতেই যাত্রীরা ট্রেনের চাকার ওপর আগুনের ফুলকি দেখতে পান। বন্ধ করে দেওয়া হয় ট্রেন চলাচল। প্রায় বিকেল চারটে নাগাদ ওই লাইনে ট্রেন চলাচল শুরু হয়েছে।

০০০০০০০০০০০০০০০০০০

রক্ষণাবেক্ষণের কাজের জন্য দক্ষিণ পূর্ব রেলের আদ্রা ডিভিশনে আগামীকাল থেকে এক সপ্তাহ বেশ কিছু ট্রেন বাতিল, যাত্রাপথ সংক্ষিপ্ত ও পরিবর্তন করা হচ্ছে। ৩০ জুলাই, ২রা এবং ৪ ঠা আগস্ট আদ্রা মেদিনীপুর মেমু বাতিল থাকবে। আদ্রা ভাগা মেমু বাতিল থাকবে ২ আগস্ট। এছাড়াও

সোম, মঙ্গল, বুধ, শনি এবং রবিবার আসানসোল-পুরুলিয়া মেমু, আদ্রাতে যাত্রা বিরতি এবং যাত্রা শুরু করবে। ২ রা আগস্ট গোমো-খড়গপুর এক্সপ্রেস, চন্দ্রকনা রোড স্টেশনে যাত্রা বিরতি করবে। সোম ও বৃহস্পতিবার টাটা-হাতিয়া এক্সপ্রেস পুরুলিয়ার বদলে গুণ্ডাবিহার-মুরি হয়ে যাবে।

০০০০০০০০০০০০০০০০০০

প্যারিস অলিম্পিকে ভারতকে প্রথম পদক এনে দিলেন শুটার মনু ভাকের। মহিলাদের ১০মিটার এয়ার পিস্তলে, ব্যক্তিগত ইভেন্টে আজ ব্রোঞ্জ পেলেন তিনি। অলিম্পিকে মহিলাদের শুটিংএ, প্রথম ভারতীয় হিসাবে মনু ভাকের পদক পেলেন।

০০০০০০০০০০০০০০০০০০

রাষ্ট্রপতি দ্রৌপদী মুর্মু, উপ-রাষ্ট্রপতি জগদীপ ধনখড়, প্রধানমন্ত্রী নরেন্দ্র মোদী প্রথম মহিলা শুটার হিসেবে অলিম্পিক্সে দেশকে পদক এনে দেওয়ায় মনু ভাকেরকে অভিনন্দন জানিয়েছেন।

রাজ্যের মুখ্যমন্ত্রী মমতা ব্যানার্জীও তাঁর এক্স হ্যান্ডেলে মনু ভাকেরকে শুভেচ্ছা জানিয়ে লিখেছেন, দেশ তাঁর এই সাফল্যে গর্বিত। কঠোর পরিশ্রম ও অধ্যবসায়ের ফলই হল এই সাফল্য।

০০০০০০০০০০০০০০০০০০০০

ভারতের পেস বোলার মহম্মদ শামিকে ইস্টবেঙ্গল ক্লাব বাংলার গৌরব সম্মান প্রদান করবে। আগামী পয়লা আগস্ট ক্লাবের ১০৫ তম প্রতিষ্ঠা দিবসে শামির হাতে এই সম্মান তুলে দেওয়া হবে। এবার প্রাক্তন ফুটবলার রঞ্জিত মুখার্জী ও প্রশান্ত ব্যানার্জীকে জীবন কৃতি সম্মাননা প্রদান করা হবে। নন্দকুমার সেকারকে বর্ষসেরা ফুটবলার এবং গোলরক্ষক প্রভু সুকন সিং

গিলকে বর্ষসেরা উদীয়মান খেলোয়াড়ের পুরস্কার দেওয়া হবে। কার্লোস কুয়াদ্রাতকে সেরা কোচের পুরস্কার দেওয়া হবে।

আগেই জানানো হয়েছে ইস্টবেঙ্গল ক্লাব এবার ভারতের ক্রিকেট দলের প্রাক্তন অধিনায়ক সৌরভ গাঙ্গুলিকে ভারত গৌরব সম্মানে সম্মানিত করবে। ইস্টবেঙ্গল ক্লাবের সচিব রূপক সাহা আজ এক প্রেস বিবৃতিতে এ খবর জানিয়েছেন।

oooooooooooooooooooooooooooooooooooo

oooooooooooooooooooooooooooooooooooo

oooooooooooooooooooooooooooooooooooo